

Regional News Unit AIR Aizawl
Saturday, April 27, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Car loan pechhuak thin Mahindra & Mahindra Financial Service Ltd. Hnuaia hnathawk thenkhat leh Mizorama car dealer 5 ten loan lem hmanga Cheng Vbc 150 vel an tih chingpen chungchang chhui mek a ni.
- Boruak muanawm tak hnuaiah Lok Sabha inthlan thawh 2-na vote thlak a ni a, nimin tlai dar 5 thleng khan vote za-a 60 chuang a tla tawh.
- Egypt chuan Gaza-a Israel leh Hamas indo mek inkahhai awh rei tur rawtna thlen turin Israel-ah palai a tir.

<><><>

LOAN FRAUD

Car loan pechhuak thin Mahindra & Mahindra Financial Service Ltd. Hnuaia hnathawk thenkhat leh Mizorama car dealer 5 ten loan lem hmanga Cheng Vbc 150 vel an tih chingpen chungchang chu nimin khan DGP Anil Shukla an thutharthehdarhtute hmaah a sawifiah a,

He sum tihchingpen naah hian a bultumtu ber chu MMFL hnuaia Mizoram Area Business Manager, Jakir Hussain, kum 41, Tejpur Assam mi a ni a, a thurualpui mi 10 te chu man an ni tawh a, mi paruk jail-ah dah an ni tawh a, mi panga te chu thuzawhfiah atan police in an la kawla a, mi 11 an man zingah hian hnamdang mi pasarih leh tualchhung mi 4 an tel a ni.

DGP sawi danin, kumin March ni 20 khan Ankit Bagree, Circle Head Of MMFL chuan sum chingpen ni a rinhlelh a awm tiin Aizawl Police Station-ah thubuui a ziaklut a, complaint-ah hian Mizorama an Area Business Manager, Jakir Hussain an sum leh pai atihchingpen thu a thlen a. FIR thehluh hi bawhzui nghal a ni a, sum a tam tham avangin CID (Crime) SP kaihhruaina hnuaiah Special Investigation Team (SIT) din nghalin, a chhuichhuah hna hi anni hian an thawk ta a ni.

DGP sawi danin, Jakir Hussain leh a thurualpuite hian document lem chi hrang hrang 2000 dawn hmangin MMSL ah hian car loan an la chhuak tawh a, Aizawl-a car dealer CK Motor, Hyundai, NBE Tata, Rafael Nissan, Aidu Motor Renault leh Standard Motor-three wheeler te pawh he thil ah hian an inhnamhnawih a, anni ho nen hian inthuralin document lem an siam a, a lem vekin thil an kalpui taa, Mahindra Finance Ltd tih hmingin account an hawng a, heng car dealer te nen hian he account hi an hmang ta a ni .

Police-te hian bank account 26 atangin Cheng Vbc 2.5 an freeze tawh a, car brand chi hrang hrang 15 Vbc 3 hu an man tawh bawka a, heng bakah hian laptop 3, mobile phone 10, file lem 549, seal lem 25, sim card 30 chuang, leh thil chi hrang hrang engemawzat an man tel bawka a ni.

MMFL hian thil diklo a awm tih an hriatchhuah dan chu, Mizoram-a mihring cheng zat ngaihtuahin car loan dil an tam lutuk chu an ringhlel a, amaherawhchu Jakir Hussain leh a thurualpui te hian rinhlelh an kai loh nan a khat tawka loan an rulh ve reng avangin an hrechhuak mai lo zawka a ni..

<><><>

MNF PR

MNF MLA Pu Robert Romawia Royte chuan, Sasci sum kum liam ta 2023-2024 chhunga vbc 700 sanction tawhah, vbc. 233.31 chu hman lova chhuah a ni a ti.

Nimin khan MNF Party Office Mizo Hnam Runah thusawiin, Pu Robert Romawia chuan SASCI sum hmahruai hi kum 2023 Oct ni 6 ah dawn a ni tawh a, thawk tura ruahman tawh chu ZPM sawrkarin sawrkar hmasa a dan ang thlapa contractor a thlan te a thawh tir duhloh avangin a lapse ta a ni a ti a. Chief Minister-in Assembly House-a a puan danin tun kum kal mekah hian SASCI ah Vbc. 500 hmu tur angin a insawi a, mahse a taka Mizoram allocation chu cheng Vbc. 275 chauh a ni ta si chu a pawl takzet a ni a ti a, Mizoram tan channa nasa tak a ni, a ti.

Pu Robert Romawia chuan ZPM an sawrkar hnu in Mizoram sum hnar lian ber thin GST ah 2023 aiin Feb 2024 thla khan zaa 14 in sum hmuh a tlahniam nghal a. March 2024 ah zaa 29 in a tlahniam leh a, a hniam zawngin nasa takin an kal a ni a ti a. Chhungkaw sing 6 tana SEDP dawngtu tur thlanfel vek tawh, Administrative Approval bakah Expenditure sanction tih vek tawh chu an cancel vek a. Mirethei chawbel an benbuak sak a, Vbc 150 an chhawm atanga vbc 110 a thlai thar lei an tum pawh wawiin thlengin pakhatmah an la lei lo a, kuthnathawktute beidawanna an thlen chho mek a ni, a ti.

MLA Dr. Vanlantanpuia pawhin thusawiin, MNF thahrui lian ber Mizo Nationalism chu hmasawanna milin na takin an kalpui zel dawn a ti a, 'India in ramri hung a tum leh FMR an tih bo dawn chuan, thuneihna an neilo,' tia, Chief Minister ber a tawng chhuak chu a pawl takzet a ti a. Mizoram, hnam kan sakhua tiboral zawnga penna reng reng chu MNF chuan an hmelma a ni a ti.

<><><>

PC PR

Peoples Conference Party, PC President Pu Vanlalruata chuan ZPM kaihhruai sorkar tharin 'Year of Consolidation' an tih fo chu 'Thlanchhuahte invulh Kum' tihna ni maiin a lang," a ti.

Nimina an Party Office-ah chanchinbumi leh mi thenkhat lenga sawmin Pu Vanlalruata chuan ZPM kaihhruai sorkarin budget a pharh hmasak ber te, Chief Minister leh Minister dang thusawi thin te leh Speaker in motor thar a lei der tawh dan te sawiin, "Inrenchem sawi uarin 'year of consolidation' an sawi nasa a. Chief Minister tiama Minister ten motor pakhat an kawl tur thu te, motor an lei loh tur thu te an sawi nasa a. Motor pakhat aia tam an kawl hlawm ni mai lovin Speaker phei chuan motor changkang chi, cheng nuai 28 man vel a lei der tawh, a ti.

ZPM kaihhruai sorkarin budget a siam hmasak bera thlanchhuahte invulhna tur nasa lutuk chu PC Party in ngaimawhawm a tih thu sawiin Pu Vanlalruata chuan, Budget en chuan Minister leh MLA te invulhna tur uchuak tak langin MLA rualten pung tlem special-a an puk thin, a hma kuma cheng nuai 200 hman thinnaah cheng nuai 1,050 lawih dah a ni a ti a. MLA LAD fund pawh a hmaa cheng nuai 6,000 hman kha cheng nuai 8,000-ah an tipung bawk, a ti a. "Kum hmasa lama Assembly budget-a wages-a cheng nuai 101.16 an hmannaah cheng nuai 141.50 hman an tum chu invulhna turu tak a ni a, zinna atana cheng nuai 111 hmannaah cheng nuai 144 hman an tum chu nuam tawlina hawi a ni bawk, a ti.

MLA te tana wages-a cheng nuai 60 vel hman thinnaa kumina cheng nuai 99.50 ruahman anih thu te; Minister leh MLA ten ruang an phurhna tur nuai 500 ruahman anih thu te pawh sawiin, an party chuan uchuak an ti hle a. Sorkar hi mipui tana hlawkna ni tura mipuiin an duh laia thlanchhuahte tana hlawkna a ni leh tho chu pawh an ti a ti a. PC Party chuan mipui tan hma a lak nasat dawn thu a sawi a ni.

<><><>

CONGRESS PR

Mizoram Pradesh Congress Committee MPCC President Pu Lal Thanzara chuan thla 4 chhungin ZPM Sorkar chuan mipuite beisei a phak lo hle a. He mi avang hian Zoram mipui tam takin Congress ah rinna an nghat leh tan mek a ni, a ti.

Nimina an party inkhawm Congress Bhavan-ah thusawiin Pu Lal Thanzara chuan tuna rorel lai ZPM hi mipuiin an dukhawp loh avangin an party chu an insiamthat zel a hun a, an thawhhona a that poh leh Pathian in mal a sawm dawn a ni a ti.

Kum 60 chhungin engmah an thawk lo tiin Prime Minister Modi-an Congress a puh ang chiah khan ZPM party chuan Kum 40 chhungin MNF leh Congress sorkar inchhawkin engmah thawk lo angin an puh a, Remna leh muanna a awm theih nan Congress Party chuan nasa takin hma a la a, MNF ten an tih thanawp tawh power siam chhuak turin an bei a, MNF hluihlawn tawh referral hospital an dinthar leh a, kuminah pawh doctor 80 bawr Mizorama thawk tur an awm ta a ni a ti.

ZPM hian an term an hmang zo lo ang tia sawi a tam hle a, anni hun zawhah hian MNF an ni ang ti an awm mang lo a ti a, ZPM sorkar chuan sum ngah inti hle siin hmunphiah a lei thei lo a, thingtlang lamah sawhthing an ching nasa hle a, sawhthing hi hmunphiah anga an lei loh an hlauh thu sawi an tam hle a, kuthnathawktute an beidawng ang tih a hlauhawm hle a ti a ni.

<><><>

BJP PR

Nimina BJP Mizoram Friday Political Session ah Mizoram BJP thupuangtu Pi Lalremsangi Fanai chuan, Lengpui Airport chungchang Mizoram State Monitoring Committee te'n an endik tih sawiin "Lengpui Airport chu Mizoram Airport a neih chhun a nih avangin Airport chei that hna thawh mek ah Mipui tana him tawklo a awma hriat a ni a, chungte chu MSPMC Member angin thuneitu ah hriattir niin, Sorkar hian hma an la ngei tur ah ngaih a ni a ti a, an siam tha lo a nih chuan BJP Party anga hmalak chhun zawm ngei a ngai dawn a ni," a ti.

He hunah hian MLA Dr K Beichhua pawhin thu sawiin, MP Candidate Pu Vanlalthmuaka BJP State President ni bawh chu a fakawm hle a, a chhan chu Party dang Candidatete a bei lova, Party dangte diklo taka beihna a chhakchhuak lo a, hei hian a puitlinzia a ti lang Chiang hle a ti a, BJP Manifesto hmangin mipui Vote a zawng mai a, hei hi a Kristian hle in a ni a ti.

<><><>

VOTING FOR 2ND PHASE OF LOK SABHA ELECTIONS COMPLETED PEACEFULLY IN 88 CONSTITUENCIES SPREAD OVER 12 STATES AND UT OF J&K

Nimin khan boruak muanawm tak hnuaiah Lok Sabha inthlan thawh 2-na vote thlak a ni.

Lok Sabha inthlan thawh 2-na hi State 12 leh Jammu & Kashmir UT huam chhunga Parliament bial 88-ah buatsaih a ni a. Chu'ngte chu Kerala-a seat 20, Karnataka-a seat 14, Rajasthan-a seat 13, Uttar Pradesh leh Maharashtra-a seat 8 ve ve, Madhya Pradesh-a seat 6, Assam leh Bihar-a seat 5 ve ve, West Bengal leh Chhattisgarh-a seat 3 ve ve, Manipur, Tripura leh Jammu and Kashmir-a seat 1 theuhthe a ni.

A tlangpui thu-in Lok Sabha inthlan thawh 2-naah hian zing dar 7 atanga tlai dar 6 thleng vote thlak a ni a. Nimin tlai dar 5 thlenga vote tla chinah chawhrualin za-a 64 vel a tla tawh a ni.

Akashvani correspondent-te report danin vote thlaka intlar a thui hlawm hle a. Vote nei thar leh hmeichhe vote thlak pawh an tam hle a ni.

Lok Sabha inthlan thawh 2-naah hian Outer Manipur-a Lok Sabha biala candidate 4 tiamin candidate 1,202 an awm a ni.

Heti hian Kerala, Rajasthan, Tripura, Tamil Nadu, Sikkim, Manipur, Meghalaya, Nagaland, Mizoram, Arunachal Pradesh, Uttarakhand, Puducherry, Lakshadweep leh Andaman and Nicobar Islands-te chuan Lok Sabha inthlan vote thlak chu an zo fel tawh a ni.

<><><>

VICE PRESIDENT JAGDEEP DHANKHAR ADDRESSES A GROUP OF SCIENTISTS OF BHARAT BIOTECH IN HYDERABAD

Vice President Jagdeep Dhankhar-a chuan India chu thiltithe chungchung tak a ni chho mek a ni a ti.

Vice President hian nimin khan Hyderabad-a Bharat Biotech Scientist rual hmaah thu a sawi a. India chun ram hmasawn ni tur leh khawvel hruaitu ni turin ke a pen mek a ti a. Khawvelin a zar a zo theihna turin hmalam hun pawh India ta a ni a ti. Vice President chuan hmasawanna kawng zawhnaa tanrual a pawimawh thu a sawi a. Zirna sanga zir chhuak tawhte pawh hmasawanna ruhrel tihchakna atan leh zingbingna lama an tanrual a pawimawh thu a sawi bawk.

<><><>

EGYPT SENDS DELEGATION TO ISRAEL TO BROKER "NEW VISION" FOR A PROLONGED CEASE-FIRE WITH HAMAS IN GAZA

Egypt chuan Gaza-a Israel leh Hamas indo mek inkahhai aw h rei tur rawtna thlen turin thuneitu sang palai lian rual nimin khan Israel-ah a tir.

Egypt sawrkar thuchhuakin a sawi danin an palai tirhte hi Egypt-a an intelligence hotu lian Abbas Kamel-a chuan a ho va. An inbiaknaah Hamas mi hrente chhuah thu te, Palestinian in leh lo rauhsante let leh chungchang te chu an thuken tur a nih thu Egypt chuan a sawi a ni.

Hetihlai hian Lebanon hel Hezbollah pawl chuan Israel sipai lirthei rual tlan lai chu ramri hrulhah missile hmangin ningani khan an lo kap a ni.

<><><>